



**UCAPAN**

**YANG MULIA**

**PENGIRAN DATO SERI SETIA HAJI MOHAMMAD TASHIM BIN PENGIRAN  
HAJI HASSAN**

**TIMBALAN MENTERI**

**KEMENTERIAN HAL EHWAL UGAMA**

**NEGARA BRUNEI DARUSSALAM**

**SEMPENA**

**PERSIDANGAN ULAMA ASIA TENGGARA 2022**

**PADA**

**30 JUN 2022, JAM 2 PETANG**

**BERTEMPAT**

**SUNWAY RESORT, KUALA LUMPUR**

بِسْمِ اللَّهِ الرَّحْمَنِ الرَّحِيمِ

الحمد لله رب العالمين والصلاة والسلام على أشرف الأنبياء والمرسلين سيدنا محمد وعلى آله وصحبه أجمعين وبعد

Yang Amat Berbahagia Dato' Sri Ismail Sabri bin Yaakob  
Perdana Menteri Malaysia

Yang Berhormat Senator Datuk Haji Idris bin Haji Ahmad  
Menteri Di Jabatan Perdana Menteri (Hal Ehwal Agama)

Yang Mulia Sheikh Dr. Mohammad bin Abdul Kareem al-Issa  
Setiausaha Agung Muslim World League

Rakan-rakan Delegasi dari negara-negara Asia Tenggara , para Ulama,  
Hadirin dan Hadirat yang dihormati,

السلام عليكم ورحمة الله وبركاته

Dan Selamat Petang

1. Alhamdulillah, dengan izin Allah Subhanahu Wata'ala kita dapat sama-sama berkumpul menghadiri Persidangan Ulama Asia Tenggara 2022 yang diadakan di Malaysia di petang yang berbahagia ini.
2. Terlebih dahulu, saya merakamkan jutaan terima kasih kepada Yang Berhormat Senator Datuk Haji Idris bin Haji Ahmad, Menteri di Jabatan Perdana Menteri (Hal Ehwal Agama) di atas jemputannya untuk saya hadir ke Persidangan ini, di mana ia merupakan platform untuk para ulama berkumpul dan berinteraksi antara satu sama lain dalam suasana harmoni dan *mahabbah*.

3. Saya juga ingin mengucapkan setinggi-tinggi tahniah dan jutaan terima kasih kepada jawatankuasa penganjur: Muslim World League (MWL) dan Jabatan Kemajuan Islam Malaysia (JAKIM) yang telah menyelenggarakan acara ini dengan penuh jayanya.

**Hadirin dan Hadirat yang dihormati sekalian,**

4. Dalam era yang kompleks dan tidak menentu di dunia moden ini, agama memainkan peranan penting dalam menghadapi cabarannya. Setentunya, perpaduan Islam menyebarkan keharmonian dan perpaduan sosial di kalangan masyarakat.
5. Lebih-lebih lagi pandemik ini, atau lebih dikenali sebagai Covid-19, telah mengubah landskap dunia; mengalihkan normal kepada norma baharu (normal to the new-norm) . Sebagai sebuah negara atau komuniti, kita semua telah diuji oleh pandemik ini. Walau bagaimanapun, telah terbukti bahawa perpaduan memainkan peranan penting dalam menghadapi cabaran sedemikian di mana kerjasama antara negara-negara termasuklah semua lapisan masyarakat: tidak kira apa bangsa atau agama bersama-sama berdiri untuk membantu antara satu sama lain dalam masa krisis ini.
6. Dalam Surah Ali-Imran Ayat 103, Allah Subhanahu Wata'ala menekankan tentang perlunya menegakkan akidah dan bersatu padu dan tidak berpecah belah antara satu sama lain.

وَاعْتَصِمُوا بِحَبْلِ اللَّهِ جَمِيعًا وَلَا تَفَرَّقُوا ۗ

*Dan berpegang teguhlah kamu kepada tali (agama) Allah dan janganlah kamu bercerai-berai*

7. Negara Brunei Darussalam menjadikan agama Islam sebagai agama rasminya menurut Ahli Sunnah Wal Jamaah sebagaimana termaktub dalam Perlembagaan Brunei 1959; dan Kebawah Duli Yang Maha Mulia Paduka Seri Baginda Sultan dan Yang Di Pertuan Negara Brunei Darussalam sebagai Ketua agama rasmi yang dinasihati oleh Majlis Ugama Islam Brunei. Begitu juga dengan falsafah Melayu Islam Beraja (MIB), Islam sangat mendalam diamalkan dalam kehidupan seharian masyarakat dan tadbir urus (governance) semua lapisan sektor kerajaan atau bukan kerajaan.
8. Kepentingan menjalani cara hidup sederhana di dalam dunia yang dinamik dan pantas berubah masa kini terbukti signifikan dalam kehidupan seharian masyarakat khususnya di Negara Brunei Darussalam. Ini juga merupakan salah satu pendekatan utama dalam tadbir urus Negara Brunei Darussalam terutamanya dalam perancangan dan pelaksanaan dasar di semua Kementerian termasuklah Kementerian Hal Ehwal Ugama. Dengan pendekatan ini, ianya dapat mengurangkan malah mencegah unsur-unsur perubahan radikal dan ekstrem.
9. Perancangan dan tindakan yang komprehensif dalam menangani ekstremisme dan terorisme ini adalah sangat penting. Justeru itu,

Negara Brunei Darussalam melalui Kementerian Hal Ehwal Ugama meletakkan pendidikan ugama dan perkhidmatan ugama yang mampan (*sustainable religious services*) sebagai sebahagian daripada paksi kepada usaha-usaha dalam perkara ini. Sistem pendidikan ugama yang tersusun dan teratur dapat menyediakan eko-sistem yang kukuh kepada semua lapisan masyarakat dalam memastikan pemahaman dan pengamalan Islam yang konkrit secara bertolak ansur dan aman. Selain daripada pendidikan ugama, penyebaran syiar dan dakwah Islam turut memastikan imej Islam sebagai ugama yang bertolak ansur, sederhana dan aman.

10. Dalam menghadapi cabaran seperti ekstremisme dan terorisme yang ditimbulkan oleh politik dan kerumitan dunia semasa, Negara Brunei Darussalam bersama-sama dengan masyarakat Antarabangsa berusaha untuk menentang kegiatan yang tidak normal tersebut. Ini dicerminkan dalam titah Kebawah Duli Yang Maha Mulia Paduka Seri Baginda Sultan dan Yang Di Pertuan Negara Brunei Darussalam semasa Perhimpunan Agung Pertubuhan Bangsa-Bangsa Bersatu ke-69 pada 25 September 2014, “Kami menyokong semua usaha serantau dan antarabangsa dalam memerangi keganasan”.
11. Dalam perkara berkaitan, kita mendapati teknologi menjadi kebiasaan dan satu keperluan dalam norma baharu pada masa kini. Antaranya, ianya mampu menyebarkan mesej secara luasnya tanpa batas dan sempadan. Oleh itu saya percaya, teknologi juga boleh menjadi peluang dan kekuatan untuk dijadikan wadah dalam

memastikan kerjasama dan keharmonian dalam pendekatan ugama untuk menangani konflik dan lain-lain.

12. Untuk mengakhiri ucapan ini, saya sekali lagi ingin mengucapkan terima kasih kepada penganjur Muslim World League (MWL) dan Jabatan Kemajuan Islam Malaysia (JAKIM) dalam mewujudkan platform ini untuk kita berinteraksi dan mengambil bahagian dengan ulama yang terbilang hari ini. Saya berdoa semoga Allah Subhanahu Wata'ala akan memberikan kejayaan kepada kita dalam usaha menegakkan Islam yang sebenar yang sederhana dan bertolak ansur demi mewujudkan keamanan dan keharmonian.

Sekian. Terima Kasih

وبالله التوفيق والهداية والسلام عليكم ورحمة الله وبركاته

-END OF PAGE-